

समे & 12:25 hrs.

<><><><><><>

### LG-Dogri Diwas

जम्मू-कश्मीर दे उपराज्यपाल मनोज सिन्हा होरें लोकें गी डोगरी मानता दिवस दियां शुभकामनां दितियां न। अपने इक सोशल मीडिया पोस्ट च एल.जी होरें आखेआ जे डोगरी भाशा स्थाढ़ी पंछान ते आत्मसम्मान दी प्रतीक ऐ। एह् ध्याड़ा असेंगी अपनी परम्पराएं, लोक कलाएं ते साहित्य गी कठेरने ते अगगे बधाने दी प्रेरणा दिंदा ऐ। आओ अस सारे मिलियै डोगरी भाशा दे संरक्षण ते प्रसार-प्रचार दा संकल्प लैचे।

<><><><><><>

### Dogri Manta Divas

अज्ज डोगरी मानता दिवस मनाया जा'रदा ऐ। अज्जे दे गै दिन ब'रे 2003 च डोगरी भाशा गी भारती संविधान दी 8मीं सूचि च शामिल कीता गेआ हा। एह् ध्याड़ा डोगरी भाशा बोलने आहलें दी समृद्ध सांस्कृतिक, साहित्यिक ते भाशाई विरासत उप्पर लोs पांदा ऐ। डोगरी भाशा ते परम्पराएं गी बढ़ावा देने लेई अज्ज केई सारे सांस्कृतिक प्रोग्रामें, सेमीनारें ते साहित्यिक कार्यक्रमें दा सरिस्ता कीता जा'रदा ऐ। विद्वानें, कलाकारें ते लखारिएं, भविक्ख दिएं पीढ़िएं लेई डोगरी भाशा दे संरक्षण ते इसी बढ़ावा देने दी जरूरतें पर जोर पांदे होई इसी डुग्गर प्रदेश दी पंछान ते विरासत दा सभनें शा अहम हिस्सा करार दिता ऐ।

<><><><><><>

## Pulse Polio

पल्स पोलियो अभियान-2026 दे तैहत 5एं बरें तगर दी उम्मी दे बच्चें गी अज्ज ते कल बी घर-घर जाइयै पोलियो शा बचाs आली दवाई दिआं बूदां पलेआइयां जाडन। सेहत मैहकमे दिआं टीमां अज्ज शैही ते ग्रामीण इलाकें च लोकें दे घर जाइयै ओकड़े बच्चें गी एह बूदां पलेआडन जेहड़े कल तय बूथ पर दवाई पीने थमां खुंजी गे हे। इस अभियान दी असरदार ढंगै सिर अमल आवरी लेई बशेश टीमां तैनात कीतिआं गेदियां न।

<><><><><><>

## Tawi Riverfront

जम्मू च नमें विकसित कीते गेदे तवी रीवरफ्रंट आहली थाहै पर जम्मू नगर निगम ते जम्मू स्मार्ट सिटी आसेआ जंदे रोज इक पैदल जातरा ते आरोग्य बैठक दी मेजबानी कीती गई। इस मौके पर मुकामी बसनीकें, पैदल जातरा, योग, सैकल चलाने ते तंदरुस्ती गी बढ़ावा देने आहली होरनें गतिविधिएं च हिस्सा लैता। जम्मू नगर निगम दे कमिशनर डाक्टर देवांश यादव होरें इस मौके पर आखेआ जे इस कार्यक्रम ने सबनें उम्मी दे लोकें लेई इक व्यापक थाहै दे तौर पर तवी रीवरफ्रंट दी भूमिका पर लोs पाई ऐ। उनें आखेआ जे इस थाहै गी होर हरा-भरा बनाने ते सैलसफा मतल्लक विकास जकीनी बनाने दे जतन कीते जा'रदे न।

<><><><><><>

## Paddy Jammu

खरीफ आहली मार्किटिंग रूतै दे दरान जम्मू खिते च मुंजी दी खुश-खरीद रिकार्ड स्तरै तगर पुज्जी गेई ऐ जेहड़ी घटोघट्ट समर्थन मुल्ल प्रणाली दी कामयाबी ते राईबाई मैहकमे दे ठोस जत्नें गी दर्शादी ऐ। अजें तगर 4 लक्ख 47 जहार क्विंटल मुंजी दी खुश-खरीद करी लैती गेदी ऐ ते एह आंकड़ा 2021-2022 बरै च कीती गेदी 4 लक्ख 5 जहार क्विंटल मुंजी दी खुश खरीद गी बी पार करी गेदा ऐ। खुश खरीद आहली इस प्रक्रिया दे कन्नै 6 जहार 130 करसानें गी लाह हासल होआ ऐ ते 106 करोड़ 48 लक्ख रपे सिद्धे उन्दे बैंक खातें च मुंतकिल करी दिते गेदे न। खुश-खरीद दी एह प्रक्रिया औंदी 31 दिसंबर तगर जारी रौहग। राईबाई मैहकमे नै आखेआ ऐ जे एह उपलब्धि करसानें दी बधी दी शमूलियत ते घटोघट्ट समर्थन मुल्ल प्रणाली च बधदे भरोसे गी दर्शादी ऐ।

<><><><><><>

## Prog. Announcement

आकाशवाणी जम्मू दा क्षेत्रीय समाचार एकांश राश्ट्री करसान दिवस-2025 दे मौके पर 25 एं मिनटें दा इक विशेष कार्यक्रम पेश करोग। इस विशेष प्रसारण दा विशेसार होग 'राश्ट्र गी खुराक देने आहले हत्थें गी सलाम'। इस कार्यक्रम दा प्रसारण मंगलवारें कल 23 दिसंबर गी दपैहरी 12 बजे कीता जाहग। इस विशेष प्रसारण च स्हाढ़े परौहने होडन कृषि उत्पादन ते करसान कल्याण मैहकमे दे संयुक्त निदेशक श्री संजय आनंद, जेहड़े कार्यक्रम दे विशे पर अपने माहिराना विचार स्हाढ़े कन्नै सांझा करडन। कार्यक्रम दी मेजबानी स्हाढ़े एंकर विजय

बजाज होर करा करदे न। इस चाल्ती दे होर सूचना प्रदान करने आहले प्रसारणें गी तुस आकाशवाणी समाचार जम्मू दे मीडियम वेव 303 मीटर यानि 990 किलोहर्टज् ते एफ.एम 103 मेगाहर्टज पर सुनी सकदे ओ।

<><><><><><>

### Weather

बड़ी मती ठंडु आहली 40 दिनें दी अवधि-यानि चिल्लें कला कश्मीर च शुरू होई गेआ ऐ ते एहदे शुरू होंदे गै घाटी च बरखा ते उच्चिएं धारें पर बर्फबारी होई ऐ। जम्मू प्रोतें दे उच्चे पहाड़ी इलाकें च बी बरखा ते बर्फबारी होई ते रातीं दे तापमान च बिंद बाद्दा दर्ज कीता गेआ ऐ। किश्तवाड़ दे पहाड़ी इलाकें सने मेचल माता मंदर आहले इलाकें ते मशहूर सैलानी थाह गुलमर्ग च बी भारी बर्फबारी दी खबर ऐ। मौसम विभाग नै अगले 24एं घंटें दरान होर मती बरखा ते बर्फबारी दी भविक्खवाणी कीती ऐ। तोआई, जम्मू-श्रीनगर राश्ट्री जरनैली शिड़क एन.एच-44 पर गड़्डिएं दी दौनें बक्खी दा आओजाई बरोबर जारी ऐ।

<><><><><><>